

Adroddiad i'r	Pwyllgor Craffu Perfformiad
Dyddiad y cyfarfod	29 Medi 2022
Aelod / Swyddog Arweiniol	Y Cyngorydd Elen Heaton, Aelod Arweiniol Iechyd a Gofal Cymdeithasol / Ann Lloyd, Pennaeth Gwasanaethau Cymorth Cymunedol Dros Dro
Awdur yr adroddiad	Nigel Jones, Rheolwr Gwasanaeth Cymorth i Fusnesau a Chymunedau
Teitl	Y wybodaeth ddiweddaraf am Ganolfan Ddydd Hafan Deg

1. Am beth mae'r adroddiad yn sôn?

1.1. Y wybodaeth ddiweddaraf am y cynnydd yng Nghanolfan Ddydd Hafan Deg

2. Beth yw'r rheswm dros lunio'r adroddiad hwn?

2.1. Darparu'r wybodaeth ddiweddaraf ynglŷn ag effeithiolrwydd trosglwyddo'r cyfleuster a'r gwasanaethau i ddarparwr allanol, KL Care, gan gynnwys cynnydd y darparwr o ran datblygu ac ehangu'r gwasanaethau sydd ar gael yn y ganolfan, a'r gwersi a ddysgwyd o Covid-19.

3. Beth yw'r Argymhellion?

Bod y Pwyllgor Craffu yn:

3.1. ystyried ac yn rhoi sylwadau ar y wybodaeth a ddarperir, ac yn

3.2. cefnogi parhad yr arfer o fonitro'n chwarterol, gyda'r bwriad o sicrhau bod cynlluniau ar gyfer y Ganolfan yn cael eu cyflawni a bod cerrig milltir allweddol yn cael eu cyrraedd.

4. Manylion yr adroddiad

- 4.1. Mae'r Ganolfan wedi llwyddo i gynyddu presenoldeb dinasyddion yn dilyn amseroedd anodd yn ystod pandemig Covid-19, ac mae bellach yn hollol weithredol eto fel canolfan ddydd ar ôl bod ynghau pan oedd Covid ar ei anterth.
- 4.2. Fodd bynnag, bu effeithiau'r pandemig ar y Ganolfan yn sylweddol, yn arbennig wrth oedi cynlluniau ar gyfer ehangu'r gwasanaethau a gynigir. Mae pob darparwr gofal cymdeithasol wedi gorfod dysgu gwersi ac addasu yn dilyn effeithiau digynsail y pandemig, gan gynnwys archwilio eu gwytnwch eu hunain, cynlluniau wrth gefn, a cheisio darparu gwasanaethau mewn ffyrdd newydd.
- 4.3. Mae'r holl wasanaethau gofal cymdeithasol yn parhau i gael trafferthion hefyd oherwydd yr argyfwng recriwtio sylweddol ym maes gofal cymdeithasol a'r cynnydd mewn costau byw. Fodd bynnag, gan ein bod wedi mynd y tu hwnt i'r ymateb brys i'r pandemig, yr ydym angen gweithio'n agos gyda'r Ganolfan er mwyn canolbwyntio eto ar gynlluniau ar gyfer datblygu ei gweithgareddau. Bydd CSDd yn gweithio gyda Hafan Deg i wneud hynny, gan ystyried y gwersi a ddysgwyd gan gomisiynydd a darparwr wrth gynllunio ar gyfer dyfodol y contract hwn a sicrhau ei fod yn parhau i ddiwallu anghenion y gymuned.
- 4.4. Ar y dechrau, bu ychydig o broblemau gyda phreswylwyr Cwrt y Gofeb Ryfel yn mynd i'r ganolfan ddydd, yn bennaf oherwydd pryderon ynglŷn â rheoli heintiau (pan oedd y pandemig wedi lleddfu, ond â Covid-19 yn parhau i ledaenu). Mae preswylwyr Cwrt y Gofeb Ryfel bellach yn mynd i'r Ganolfan ar gyfer prynhawniau coffi a nosweithiau bingo, ac mae perthnasoedd wedi gwella'n fawr. Mae hyn yn brawf o'r cyfathrebu agored a'r hyblygrwydd mae'r holl bartïon wedi eu cynnig.
- 4.5. Hefyd, y mae gwaith yn mynd rhagddo i sicrhau bod preswylwyr Cwrt y Gofeb Ryfel, ochr yn ochr â dinasyddion Hafan Deg, yn cael y cyfle i ddefnyddio cyfarpar TG yn y Ganolfan. Dylai hyn ddarparu adnodd cymunedol gwerthfawr, gan gynnal gwell cysylltiadau cymunedol a lles ar yr un pryd.
- 4.6. Yn ystod ymweliad monitro contract yn ddiweddar (Mehafin 2022), er y nodwyd nifer o feysydd ar gyfer eu gwella, yr oedd y rheiny a oedd yn mynd i'r ganolfan yn ymddangos yn hapus ac wedi ymlacio. Yr oedd y staff yn gyfeillgar ac yr

oedd yn amlwg eu bod yn adnabod yr unigolion yn dda. Mae'r Ganolfan, yn y bôn, yn parhau i ddarparu gofal yn canolbwyntio ar yr unigolyn i'r holl ddinasyddion sy'n mynd yno, gan gefnogi gweledigaeth y Cyngor ar gyfer gofal cymdeithasol i oedolion, y pum ffordd at les, a gofynion Deddf Gwasanaethau Cymdeithasol a Llesiant (Cymru) 2014.

4.7. Yr ydym ar hyn o bryd yn datblygu cynllun gweithredu gyda KL Care er mwyn cynorthwyo'r Ganolfan i fynd i'r afael â'r meysydd a nodwyd ar gyfer eu gwella, a chymryd y camau cywiro a datblygu sydd eu hangen i alluogi'r gwasanaeth i fodloni gofynion y contract yn llawn.

4.8. Mae'n rhaid monitro contract yn gadarn ac yn rheolaidd er mwyn sicrhau bod cynlluniau ar gyfer y ganolfan yn cael eu cyflawni, a bod cerrig milltir allweddol yn cael eu cyrraedd. Tarfodd y pandemig yn sylweddol ar weithgareddau monitro contract hefyd; mae CSDd yn parhau i weithio ar ddod â'r holl fonitro'n gyfredol, ac mae dychwelyd i ddarparu gwybodaeth monitro perfformiad yn rheolaidd o Hafan Deg yn gam allweddol yn ei gynllun gweithredu newydd, a fydd yn cael ei fonitro'n agos.

5. Sut mae'r penderfyniad yn cyfrannu at y Blaenoriaethau Corfforaethol?

5.1. Mae'r gwasanaethau presennol yn Hafan Deg eisoes yn ategu blaenoriaethau corfforaethol yn ymwneud â chymunedau cryfion a chymunedau wedi eu cysylltu – a bydd cynlluniau ar gyfer datblygiadau yn y Ganolfan yn gwella hyn ymhellach.

6. Faint fydd hyn yn ei gostio a sut y bydd yn effeithio ar wasanaethau eraill?

6.1. Mae'r gwasanaeth yn parhau i gael ei ddarparu o fewn costau pendant y contract.

7. Beth yw prif gasgliadau'r Asesiad o'r Effaith ar Les?

7.1. Oherwydd effeithiau Covid-19, nid yw'r cynlluniau ar gyfer ehangu'r gwasanaethau yn y ganolfan ddydd wedi eu cyflawni eto. Felly, nid yw'r gwasanaethau a gynigir gan y ganolfan lawer gwahanol yn eu hanfod i'r rheiny a oedd yno adeg yr asesiad effaith blaenorol (Atodiad 1). Argymhellir ailymweld

â'r Aseiad o'r Effaith ar Les pan fydd camau gweithredu allweddol wedi eu cyflawni yn unol â chynllun gweithredu KL Care, a'r gwaith o ehangu gweithgareddau yn y Ganolfan wedi aildechrau o ddifrif, gan ein bod bellach yn gwella o effeithiau uniongyrchol y pandemig.

8. Pa ymgynghoriadau sydd wedi eu cynnal gyda Chraffu ac eraill?

8.1. Amherthnasol

9. Datganiad y Prif Swyddog Cyllid

9.1. Amherthnasol

10. Pa risgiau sydd ac a oes unrhyw beth y gallwn ei wneud i'w lleihau?

10.1. Bydd parhau i fonitro'n chwarterol (a'i gryfhau) yn lleihau risgiau, oherwydd bydd problemau'n cael eu canfod ac yn cael sylw'n gynt, gyda chefnogaeth CSDd fel bo'r angen.

11. Pŵer i wneud y penderfyniad

Adran 21 Deddf Llywodraeth Leol 2000

Adran 7 Cyfansoddiad y Cyngor